

Poštovani prijatelji, kolegice i kolege,

U ime Instituta za istoriju želim vas pozdraviti i zahvaliti da ste našli vremena danas s nama podijeliti našu radost zbog mogućnosti da javnosti predstavimo tri nove knjige u izdanju našeg Instituta.

Ove tri knjige su samo jedna karika u nizu knjiga koje smo objavili proteklih godina. Ukratko ću samo podsjetiti na neke od objavljenih zbornika ili monografija: BH gradovi na prijelazu 19. i 20. stoljeća, Crkva bosanska u 15. stoljeću, Veliki vojvoda bosanski Sandalj Hranić, Sarajevo: biografija grada; ili: Historijski mitovi na Balkanu, Fenomen krstjani u srednjovjekovnoj Bosni i Humu, 60 godina od završetka Drugog svjetskog rata - kako se sjećati 1945?, Heroje Treće gimnazije, Revizija prošlosti na prostorima bivše Jugoslavije, Rasprave o nacionalnom identitetu Bošnjaka, ili prijevode poput Ljetnog putovanja po Bosni i Hercegovini princa Muhamed Ali-paše i tako dalje.

To je rezultat našega rada ali istodobno to je bio i naš odgovor na brojne politikante, diletante i instant „historičare“ koji se pojavljuju „niotkud“ i odjedanput se žele nametati kao vrhovni autoriteti koji bi svima da dijele lekcije kako trebaju raditi. Nismo mi, sigurno, džaba prije nekoliko godina dobili Šestoaprilsku nagradu Grada Sarajeva.

Danas promoviramo tri knjige u izdanju Instituta. Promotori su, osim mene, profesor Išek, koji će govoriti o knjizi Društveni i ekonomski razvoj BiH od 1945. do 1953 i docent Edin Radušić, koji će govoriti o knjizi Hod po trnju. Iz bosanskohercegovačke historije 20. stoljeća.